

Khamis ,5 Februari 2015

1. Tujuh pegawai imigresen ditahan

Dipercayai terbabit sindiket jual PLS kepada warga asing

KUALA LUMPUR 4 Feb. - Satu sindiket dipercayai menjual ratusan Pas Lawatan Sosial (PLS) sehingga RM11,000 setiap satu kepada warga Pakistan di Sabah, berjaya ditumpaskan berikutan penahanan tujuh pegawai imigresen termasuk seorang berpangkat Timbalan Penolong Pengarah di negeri itu kelmarin.

Penahanan yang disifatkan terbesar di Sabah membabitkan pegawai imigresen itu dilakukan oleh Suruhanjaya Pencegahan Rasuah Malaysia (SPRM).

Menurut sumber, semua mereka ditahan di pejabat masing-masing iaitu lima di Lahad Datu manakala dua lagi di Kota Kinabalu.

Modus operandi pegawai terlibat dipercayai termasuklah menerima sijil nikah palsu daripada 'bakal pembeli' warga Pakistan terbabit, bagi tujuan kelulusan PLS Jangka Panjang.

Sijil nikah merupakan bukti penting dikehendaki pihak imigresen daripada pemohon PLS Jangka Panjang iaitu di bawah kategori pemohon adalah suami atau isteri kepada warganegara Malaysia, bagi membuktikan perkahwinan itu wujud.

Sumber memberitahu, SPRM turut merampas wang tunai berjumlah RM50,000 di rumah salah seorang daripada mereka, dua keping cek bernilai RM175,000 dan RM7,500 serta beberapa fail berkaitan di Pejabat Imigresen Lahad Datu.

"Sindiket ini dipercayai telah mengeluarkan ratusan PLS Jangka Panjang termasuk kepada warga Pakistan sejak tahun lalu dengan harga mencecah RM11,000 setiap satu," katanya ketika dihubungi di sini hari ini.

Sebelum memperoleh PLS Jangka Panjang, pemohon yang bernikah dengan warganegara Malaysia mestilah mendapatkan Pas Khas yang perlu diperbaharui setiap bulan atau PLS jangka pendek (tempoh sah tiga bulan) untuk tinggal di negara ini.

Sedangkan, tempoh sah PLS Jangka Panjang enam bulan, setahun, tiga tahun atau lima tahun itu.

Seseorang yang mempunyai PLS Jangka Panjang dan telah tinggal sekurang-kurangnya lima tahun di negara ini, boleh memohon taraf Pemastautin Tetap (PR) Malaysia.

Sumber tersebut menambah, tangkapan ini dilakukan ekoran aduan berkaitan terdapat warga Pakistan memperoleh pas tersebut dengan menggunakan sijil nikah palsu.

Sementara itu, Pengarah SPRM Sabah, Datuk Hishamuddin Hashim ketika dihubungi mengesahkan penahanan tersebut dan memaklumkan semua suspek kini direman antara empat hingga tujuh hari sejak semalam.

"Majistret mengeluarkan perintah tahanan reman selama tujuh hari bermula semalam kepada lima pegawai yang ditahan di Pejabat Imigresen Lahad Datu manakala empat hari kepada dua lagi yang ditahan di Kota Kinabalu," katanya di sini hari ini.

Tambah Hishamuddin, kes tersebut disiasat mengikut Seksyen 17(a) Akta Suruhanjaya Pencegahan Rasuah Malaysia 2009.



Khamis ,5 Februari 2015

2. Kurangkan pembalakan

KUALA LUMPUR 4 Feb. - Bekas Perdana Menteri, Tun Dr. Mahathir Mohamad menggesa kegiatan pembalakan dikurangkan bagi mengelakkan bencana banjir besar berulang di Pantai Timur.

Menurut beliau, tindakan mencegah pembalakan haram sahaja tidak mencukupi, sebaliknya, kerajaan juga perlu mengawal pembalakan berlesen.

"Saya berpendapat bukan sahaja kita perlu tumpu pembalakan haram, yang halal (pembalakan berlesen) pun patut dikurangkan, kita ada banyak punca kekayaan di dalam negara kita yang tidak menyebabkan alam sekitar dicemari.

"Jadi, kalau kita kurangkan potong kayu, walaupun secara halal, kita akan dapat banyak manfaat," katanya selepas lawatan ke Institut Penyelidikan Perhutanan Malaysia (FRIM) di sini hari ini.

Dalam lawatan berkenaan, beliau merasmikan pemasangan plak FRIM sebagai warisan kebangsaan dan menerima menerima taklimat mengenai pelaksanaan Projek Digital FRIM.

Projek Digital FRIM yang dijayakan menerusi kerjasama FRIM dengan Cube Global Sdn. Bhd. merupakan inisiatif untuk mendokumentasikan semua pokok dan pelbagai tarikan di FRIM secara digital.

Yang turut hadir, Ketua Setiausaha Kementerian Sumber Asli dan Alam Sekitar, Datuk Seri Zol Azha Yusof dan Ketua Pengarah FRIM, Datuk Dr. Abd. Latif Mohmod.

Menurut Dr. Mahathir, pembalakan menjadi antara punca banjir besar berlaku di Pantai Timur kerana kegiatan itu memusnahkan kawasan tadahan hujan.

"Kalau kita tidak berjaga-jaga, masalah yang sama akan berulang setiap tahun, kita harus ambil iktibar daripada peristiwa ini dan mencari jalan mengekalkan hutan," katanya.

Mengenai dakwaan wujudnya warga Malaysia yang mensabotajkan ekonomi negara dengan menjatuhkan nilai ringgit, beliau berkata, kejatuhan nilai ringgit pada 1998 adalah kerana pedagang mata wang antarabangsa manakala faktor kejatuhan kali ini harus dikaji dengan teliti.

"Kita kena pastikan betul atau tidak dia (orang didakwa) menjual mata wang Malaysia," katanya.

Dalam pada itu, mengulas tentang trend harga barang yang tidak turun walaupun harga minyak turun, Dr. Mahathir berkata, manfaat daripada harga minyak rendah tidak dapat dirasai sepenuhnya kerana nilai ringgit jatuh menyebabkan kos import meningkat.

Ketika diminta mengulas mengenai kenyataan boikot peniaga oleh Menteri Pertanian dan Industri Asas Tani, Datuk Seri Ismail Sabri Yaakob, yang dianggap perkauman itu, beliau berkata: "Kalau kita hendak berkelahi pasal rasis, saya pun tidak boleh komen sebab orang juga kata saya rasis".

Dalam pada itu, Dr. Mahathir meluahkan rasa gembira dapat kembali melawat FRIM selepas cadangannya pada 30 tahun lalu berjaya menjadikan FRIM sebuah badan berkanun selain kawasan FRIM menjadi destinasi pelancongan.



Sabtu ,7 Februari 2015

3. Audit Penasihat bantu pelaksanaan GST

KUALA LUMPUR 6 Feb. - Sebuah pasukan Audit Penasihat akan ditubuhkan di bawah Jabatan Kastam Diraja Malaysia (JKDM) bagi membantu melancarkan pelaksanaan tahun pertama dan kedua cukai barang dan perkhidmatan (GST).

Timbalan Menteri Kewangan, Datuk Chua Tee Yong berkata, cadangan penubuhan pasukan khusus tersebut hasil perbincangan dengan syarikat multinasional (MNC) yang memerlukan pertolongan berkaitan pelaksanaan GST merandangkan industri mereka lebih besar dan rumit jika dibandingkan dengan industri tempatan.

Katanya, pihaknya juga telah memberi keyakinan kepada MNC bahawa denda tidak akan dikenakan semasa pelaksanaan GST terutamanya jika terdapat kesalahan seperti pengiraan cukai yang tidak tepat mungkin disebabkan oleh perisian dan sebagainya.

"Tujuan audit yang digunakan pada permulaan pelaksanaan GST adalah Audit Penasihat dan bukan audit penalti. Tujuan kami bukanlah untuk memberi penalti malah JKDM telah menekankan perkara

ini banyak kali termasuk semasa pendaftaran dan kerana itulah tarikh pendaftaran telah dilanjutkan sehingga 28 Februari ini.

"Pada tahun pertama mungkin semua syarikat ini tidak dapat diaudit, jadi Audit Penasihat ini mungkin akan melibatkan jangka masa satu hingga dua tahun," katanya.

Beliau berkata demikian selepas menghadiri majlis meja bulat Kementerian Kewangan dan JKDM bersama Majlis Perniagaan Amerika Syarikat-ASEAN di sini hari ini.

Sementara itu, Tee Yong berkata, bagi mengelakkan kekeliruan antara kadar standard dan kadar sifar dalam industri farmaseutikal, maka terdapat cadangan diwujudkan kod bar tambahan bagi memudahkan pelaksanaan GST nanti.



Rabu ,11 Februari 2015

4. Pegawai kerajaan berdepan dakwaan rasuah

SHAH ALAM 11 Feb. - Ketua Pegawai Tadbir Jabatan Mineral dan GeoSains Malaysia, Kementerian Sumber Asli dan Alam Sekitar dihadapkan ke Mahkamah Sesyen di sini atas tuduhan bersetuju menerima rasuah sebuah kereta bernilai kira-kira RM100,000 bagi meluluskan permohonan lesen pajak gadai, tiga tahun lalu.

Ketika kejadian, tertuduh B. Kalaichelan, 33, bertugas sebagai Pegawai Tadbir dan Diplomatik Gred M48 dengan jawatan Timbalan Setiausaha Bahagian, Bahagian Pemberi Pinjam Wang dan Pemegang Pajak Gadai, Kementerian Kesejahteraan Bandar Perumahan dan Kerajaan Tempatan. - UTUSAN ONLINE

Rabu ,11 Februari 2015

5. Teguran dalam laporan audit diambil tindakan-PM



NAJIB TUN RAZAK ketika merasmikan Perhimpunan Pertubuhan Audit Negara Asia (Asosai) XIII di Hotel Royale Chulan, Kuala Lumpur, semalam. Turut kelihatan, Ambrin Buang (kiri) dan Shashi Kant Sharma (kanan). - UTUSAN/SYEFRY MONIZ

KUALA LUMPUR 10 Feb. - Datuk Seri Najib Tun Razak berkata, kerajaan mengambil serius tanggungjawab untuk melaksanakan tindakan berdasarkan penemuan dan teguran daripada Jabatan Audit Negara.

Menurut Perdana Menteri, kerajaan bukan sahaja bersedia mengambil tindakan pembetulan tetapi juga tindakan hukuman terhadap mereka yang tidak bertanggungjawab.

"Saya memberi jaminan bahawa kerajaan bukan sahaja terbuka kepada cadangan daripada pihak audit tetapi juga amat menghargai input-input yang diberikan dalam kajian polisi, perancangan dan penilaian projek.

"Di Malaysia, juru audit memainkan peranan amat besar untuk mengukuhkan integriti dalam urus tadbir perkhidmatan awam," katanya ketika berucap merasmikan Persidangan Pertubuhan Audit Negara Asia (Asosai) di sini hari ini.

Yang turut hadir, Menteri di Jabatan Perdana Menteri, Datuk Seri Paul Low Seng Kuan; Ketua Audit Negara, Tan Sri Ambrin Buang serta Pengurus Asosai, Shashi Kant Sharma.

Menurut beliau, Malaysia mengiktiraf Jabatan Audit Negara yang memberi banyak sumbangan dari segi kutipan hasil, penilaian projek kerajaan serta meneroka potensi pembangunan.

"Bebas daripada ikatan politik, juru audit memberi pendapat yang bebas dan profesional serta mempunyai objektif dan komitmen tinggi untuk meningkatkan produktiviti dan tahap efisien.

Dalam pada itu, menurut Najib, beliau amat berbangga dengan kejayaan Ambrin dipilih sebagai Pengurus Asosai bagi penggal 2015-2018 dan Malaysia dijadikan tuan rumah kepada persidangan pertubuhan itu.

"Dalam 37 tahun kewujudannya, Asosai telah banyak memberi sumbangan kepada negara-negara yang menganggotainya sama ada dari segi pencapaian individu dan pembangunan negara.

"Saya juga berbangga Institusi Audit Tertinggi (SAI) Malaysia juga telah memainkan peranan utama dalam meningkat keupayaan dan perkongsian pengetahuan dalam kalangan negara anggota Asosai dan juga Pertubuhan Audit Negara ASEAN (ASEANSAI)," katanya.

Katanya, SAI Malaysia juga mempunyai penglibatan aktif dalam mengaudit projek-projek mega kerajaan termasuk projek Transit Aliran Massa (MRT), projek landasan kereta api laju Kuala Lumpur-Singapura serta projek integrasi minyak dan gas di Johor.

Rabu ,11 Februari 2015

6. Kursus Bahasa Inggeris untuk pegawai jabatan

MELAKA 10 Feb. - Kerajaan negeri menyarankan pegawai jabatan kerajaan agar mengambil peluang mengikuti kursus Bahasa Inggeris di Universiti Teknikal Malaysia Melaka (UTeM) bagi memantapkan penguasaan bahasa tersebut.

Ketua Menteri, Datuk Seri Idris Haron berkata, pengajian selama empat bulan itu boleh diikuti bermula Mac ini.

"Masalah penguasaan Bahasa Inggeris dalam kalangan pegawai kerajaan negeri telah saya maklum kepada Naib Canselor UTeM dan beliau bersedia membantu menanganinya dengan menawarkan kursus Bahasa Inggeris melalui Pusat Bahasa dan Pembangunan Insannya.

"Pusat ini merangka program Bahasa Inggeris khas untuk pegawai di jabatan kerajaan negeri bagi meningkatkan kemahiran dan kualiti mereka dalam berbahasa Inggeris.

"Bukan hanya Bahasa Inggeris, malah bahasa lain juga turut ditawarkan kepada mereka yang berminat termasuklah Bahasa Korea, Arab, Jepun dan Mandarin," katanya demikian ketika berucap dalam Majlis Perhimpunan Bulanan Kerajaan Negeri anjuran UTeM di Kampus Durian Tunggal, di sini semalam.

Menurutnya, kerajaan negeri melalui Tabung Amanah Pendidikan Melaka (Tapem) akan membiayai separuh daripada kos pengajian bagi kursus tersebut.

Dalam pada itu, Naib Canselor UTeM, Prof. Datuk Dr. Shahrin Sahib berkata, UTeM menyediakan kursus tersebut bagi membantu kerajaan negeri mempertingkatkan kemahiran bahasa tersebut dalam kalangan pegawainya.

"Sebagai sebuah negeri pelancongan, penguasaan Bahasa Inggeris penting dalam kalangan pegawai kerajaan negeri kerana ia dapat memudahkan lagi komunikasi dengan pihak luar," katanya.

Rabu ,11 Februari 2015

7. Laporan pertama indeks dijangka keluar dalam tempoh setahun

PUTRAJAYA 10 Feb. - Laporan pertama Indeks Syariah Malaysia yang akan dilaksanakan di semua kementerian dan agensi pelaksanaanya dijangka dapat dikeluarkan dalam tempoh kurang setahun.

Timbalan Pengerusi I Jawatankuasa Tadbir Urus Indeks Syariah Malaysia, Prof. Datuk Seri Dr. Zaleha Kamaruddin berkata, pihaknya akan mengukur semua kementerian terbabit berdasarkan lapan bidang utama iaitu perundangan, politik, ekonomi, pendidikan, kesihatan, budaya, prasarana dan persekitaran serta sosial.

Untuk setiap bidang itu kemudiannya akan dilihat pada penyempurnaan lima aspek dalam Maqasid Syariah iaitu pemeliharaan agama, pemeliharaan nyawa, pemeliharaan akal, pemeliharaan keturunan dan pemeliharaan harta.

"Indeks Syariah ini akan diukur di setiap kementerian, agensi pelaksana dan masyarakat setiap tahun iaitu kementerian diukur berdasarkan fakta, agensi pelaksana diukur berdasarkan penggubalan polisi serta dasar manakala masyarakat diukur berdasarkan persepsi.

"Jadi, setiap tahun setiap kementerian perlu tunjukkan pergerakan positif contohnya jika tahun ini memperoleh markah sebanyak 60 untuk tahun depan perlu ditingkatkan kepada 70 dan seterusnya, ini bagi menunjukkan kesungguhan serta keseriusan Malaysia dalam memartabatkan Islam," katanya.

Beliau berkata demikian kepada pemberita selepas majlis Perdana Ulama Umara Bersama Perdana Menteri 2015 dan Pelancaran Indeks Syariah Malaysia di Pusat Konvensyen Antarabangsa Putrajaya (PICC) di sini hari ini.

Dalam majlis itu, Perdana Menteri, Datuk Seri Najib Tun Razak turut mengumumkan pelantikan sebanyak sembilan ahli panel bagi menganggotai Jawatankuasa Tadbir Urus Indeks Syariah Malaysia termasuk Rektor Universiti Islam Antarabangsa Malaysia (UIAM) itu.

Anggota lain, Pengerusi Jawatankuasa Majlis Fatwa Kebangsaan, Prof. Emeritus Tan Sri Dr. Abdul Shukor Husin (Pengerusi); Datuk Aidit Ghazali (Timbalan Pengerusi II); Ketua Pengarah Jabatan Kemajuan Islam Malaysia (Jakim), Datuk Othman Mustapha (Naib Pengerusi I) dan Setiausaha Politik kepada Perdana Menteri, Datuk Jailani Ngah (Naib Pengerusi II).

Selain itu, Ketua Pengarah Unit Penyelarasan Pelaksanaan, Jabatan Perdana Menteri, Tan Sri Shukry Md. Salleh (Panel Pakar dan Polisi); Dekan Fakulti Syariah dan Undang-Undang, Universiti Sains Islam Malaysia, Prof. Dr. Abd Samad Musa (Panel Pakar Syariah), Pensyarah Matematik Universiti Teknologi Mara (UiTM) Prof. Dr. Mohammad Said Zainol (Panel Pakar Indeks) dan Yang Dipertua Yayasan Dakwah Islam Malaysia (Yadim), Datuk Dr. Asyraf Wajdi Dusuki (Panel Pakar Ekonomi Islam).

Menurut Zaleha, semua jawatankuasa yang baharu dilantik itu juga akan bermesyuarat secepat mungkin bagi menyelesaikan isu teknikal serta penggunaan keputusan serta metodologi yang betul bagi mengukur Indeks Syariah.

Sementara itu, Othman berkata, pelaksanaan indeks tersebut bukan sahaja memberi manfaat kepada masyarakat Islam tetapi juga meliputi bukan Islam.

"Inisiatif yang kita sedang buat ini akan fokus pada program yang sudah ada nama Islam dan program yang tidak menggunakan nama Islam tetapi mempunyai nilai murni. Ini bagi memberi gambaran kepada masyarakat bahawa apa yang dilakukan oleh kerajaan mengikut lima perkara dalam Maqasid Syariah.

"Selain itu, program yang dibuat itu juga akan memberi manfaat kepada bukan Islam contohnya kepada keluarga yang mana kita mahukan sebuah keluarga harmoni, tidak berpecah dan tiada penyakit sosial seperti dadah, jadi ini merupakan satu program yang bukan sahaja untuk masyarakat Islam tetapi juga bukan Islam," katanya.



Selasa, 17 Februari 2015

8. Projek Hospital Unisza bukan punca banjir

KUALA TERENGGANU 17 Feb. - Naib Canselor Universiti Sultan Zainal Abidin (Unisza), Prof. Datuk Dr. Yahaya Ibrahim menyifatkan dakwaan pihak tertentu yang mengaitkan pembinaan hospital universiti itu sebagai penyebab utama banjir di Kuala Nerus sebagai tidak berasas.

Yahaya berkata, pihak yang membuat dakwaan itu tidak ada pengetahuan langsung mengenai rangkaian dan sistem saliran air yang terdapat dalam universiti itu termasuk di kawasan tapak pembinaan hospital terbabit.

"Projek hospital itu pun belum dilaksanakan dan kita baharu buat pecah tanah. Jadi pelik, apabila belum ada sebarang projek pembangunan yang dilaksanakan, macam mana boleh kata projek itu menyebabkan banjir di kawasan sekitar?

"Segalanya masih pada peringkat awal," katanya kepada pemberita selepas merasmikan Malam Anugerah Kewartawanan Unisza 2015 di Hotel Primula di sini baru-baru ini.

Katanya, banjir kilat penghujung tahun lalu sebenarnya berpunca dari kawasan perumahan berdekatan yang tidak mempunyai sistem perparitan sempurna, sekali gus menyebabkan air mengalir masuk ke kawasan universiti dan juga mengalir ke kawasan sekitar termasuk Universiti Malaysia Terengganu (UMT).

Mengulas lanjut, Yahaya memberitahu, pihaknya telah membuat perancangan rapi dengan melantik satu pasukan khas bagi membuat kajian mendalam berhubung cara terbaik untuk menangani masalah aliran air dalam universiti itu sebelum membentangkan cadangan pembinaan hospital.

"Tapak hospital yang ada sekarang pun kita akan pastikan tidak akan digenangi air seperti beberapa kawasan sekitar khususnya jika hujan lebat berterusan," katanya.

Sehubungan itu, katanya, tiga kolam tadahan di dalam kampus utamanya di Kuala Nerus akan dibina bagi mengatasi masalah banjir yang turut melibatkan kawasan kampus itu penghujung tahun lalu, dan akan dijayakan dengan kerjasama Jabatan Pengairan dan Saliran.

"Projek yang dianggarkan menelan kos RM400,000 ini untuk menakung air hujan yang tidak dapat ditampung saliran dan longkang sedia ada. Usaha ini dalam proses akhir reka bentuk dan dijangka siap sebelum musim tengkujuh tahun ini," jelasnya.

Mengenai pembangunan di Unisza, beliau berkata, selain pembinaan hospital tersebut yang bernilai RM600 juta, sebuah bangunan kanselor yang baharu bernilai RM30 juta juga akan dibina sebagai premis ikon Unsza.

Yahaya juga memberitahu, bangunan-bangunan tertentu yang agak lama dan tidak selamat akan diruntuhkan untuk dibina semula menggunakan peruntukan Rancangan Malaysia Ke Sebelas (RMK11) dengan kos dijangka lebih RM100 juta.



Rabu ,18 Februari 2015

9. Doktor dakwa klinik diserbu tanpa sebab

PERMATANG PAUH 17 Feb. - Seorang doktor membuat laporan polis semalam mendakwa tindakan sekumpulan kakitangan Kementerian Kesihatan negeri membuat serbuan dan merampas data pesakit dalam komputernya sebagai satu tindakan yang tidak wajar.

Dr. Abdullah Zawawi Samsudin, 47, yang mungkin bertanding dalam Pilihan Raya Kecil (PRK) Permatang Pauh sebagai calon Bebas mendakwa, tindakan itu menyebabkan kliniknya tidak dapat beroperasi kerana semua data pesakit telah diambil tanpa salinan.

Beliau berkata, keadaan itu boleh mendorong risiko kepada pesakitnya jika kliniknya beroperasi.

"Saya kesal kerana diperlakukan seperti seorang pengganas dan saya percaya tindakan ini bermotif politik untuk menyerang peribadi saya dan merosakkan perniagaan saya.

"Perbuatan ini jijik, kotor dan menjatuhkan reputasi saya di hadapan kakitangan saya," katanya dalam sidang akhbar di sini hari ini.

Dalam serbuan pada pukul 3.30 petang semalam, sepasukan wakil dari Kementerian Kesihatan telah membuat serbuan dan merampas data peribadi pesakit, lesen perniagaan Majlis Perbandaran Seberang Perai (MPSP), buku gaji, jadual gaji dan pelbagai dokumen lain.

Abdullah memberitahu, kliniknya bukan beroperasi secara haram kerana mempunyai sijil yang sah.

"Saya tidak tahu apa sebenarnya dan buktikan jika saya ada kesalahan," katanya.

Sementara itu, Pengarah Jabatan Kesihatan negeri, Datuk Dr. Zailan Adnan tidak dapat dihubungi bagi mendapatkan sebarang pengesahan mengenai tindakan tersebut.

Mengenai penyertaannya dalam PRK Permatang Pauh kali ini Abdullah menjelaskan, beliau tidak takut untuk bertanding kerana pernah melaluinya pada 2013.



Ahad ,22 Februari 2015

10. SPRM selamatkan RM33j

Kesan 773 keluarga buat tuntutan palsu rumah kekal mangsa

KOTA BHARU 22 Feb. - Suruhanjaya Pencegahan Rasuah Malaysia (SPRM) berjaya 'menyelamatkan' sebanyak RM33 juta peruntukan membina rumah kekal mangsa banjir di negeri ini selepas mengesan 773 keluarga dipercayai membuat tuntutan palsu.

Pengarah SPRM negeri, Datuk Abdul Aziz Aban berkata, sebelum ini, sebanyak 2,030 orang terutama di Kuala Krai telah menghantar pengakuan bahawa rumah mereka musnah sepenuhnya akibat malapetaka tersebut yang berlaku hujung tahun lalu.

Bagaimanapun, beliau berkata, selepas pihaknya menubuhkan Jawatankuasa Integriti Pengurusan Tabung dan Dana Banjir pada bulan lepas bagi memastikan bantuan benar-benar sampai kepada mangsa yang layak, jumlah permohonan tersebut berkurangan.

"Bila jawatankuasa yang turut mendapat kerjasama Majlis Keselamatan Negara (MKN) memperkenalkan satu borang perakuan untuk mendapatkan pernyataan bagi sebarang kenyataan palsu berkaitan tuntutan yang mana jika wujud sebarang penipuan boleh didakwa di bawah Seksyen 18 Akta SPRM, jumlah permohonan semakin berkurangan daripada 2,030 kepada 1,257 permohonan.

"Sebuah isi rumah boleh menuntut RM40,000 hingga RM45,000 untuk kemusnahan keseluruhan yang jika didarabkan dengan 773 permohonan, bermakna ini merupakan penjimatan sebanyak RM33 juta," katanya.

Beliau berkata demikian kepada pemberita selepas majlis Taklimat Khas Pindaan Perlembagaan Persekutuan Mewujudkan Suruhanjaya Perkhidmatan SPRM kepada wakil-wakil Pas dan Parti Keadilan Rakyat (PKR) di sini hari ini.

Yang turut hadir, Menteri Besar, Datuk Ahmad Yakob; Timbalan Ketua Pesuruhjaya (Pengurusan dan Profesionalisme) SPRM, Datuk Zakaria Jaffar; Ahli Parlimen Kota Bharu, Datuk Takiyudin Hassan dan Ahli Parlimen serta Dewan Undangan Negeri (ADUN) Pas negeri.

Baru-baru ini, Kabinet bersetuju membina rumah kekal berharga RM48,000 setiap unit khusus untuk mangsa terjejas banjir yang rumah mereka musnah secara keseluruhannya.

Kerajaan juga bersetuju membaik pulih rumah rosak akibat banjir besar itu dengan bantuan maksimum sebanyak RM5,000 untuk setiap keluarga dan pada masa sama, setiap isi rumah yang terjejas turut menerima wang ihsan sebanyak RM500.

Sementara itu, Abdul Aziz berkata, selain mendapati jumlah keluarga yang menuntut wang ihsan tersebut semakin menurun selepas tertubuhnya jawatankuasa tersebut, terdapat juga permohonan melibatkan dua individu dalam sesebuah rumah.

"Apabila disemak kembali senarai yang diserahkan oleh Majlis Keselamatan Negara, kita juga mendapati terdapat pertindanan atau pemalsuan iaitu permohonan berulang dalam satu isi rumah," jelas beliau.